

## Balua gba Polo pi Tito Eli na kalanu

Tito inde akolo nani kpála na kulu bhú dabili bini ne Polo, ani atsia adu di ateteke ani bhú kulu gba e na Ebhe inde ani adu adholo ne e, ani adu nani mupagano inde adji bua e, ani atsia aziba Kilisito . Polo aye balua inde pi Tito, makombi inde adu ateteke ani bhú Dadjua gba Ebhe na Kelete-o. Polo a'o nani ká ani oo ngubula natsia 'kpí lí kulu na Dadjua gba Ebhe ang-o. Ngbengbe 'ngú bhú balua inde bata.

Engú na kalanu u aye bhú balua inde-e, ko nasuno pi Tito dasundu inde a ayo me obhelesi okpála na Dadjua gba Ebhe du ne e, adu kpi ne bhe na sisiti inde lí okpála na Kelete nde ne e ko. Pipita-a, Polo ngaha líli pi Tito me ani du musuno pi limbi okpála ngangá na Dadjua gba Ebhe-o. Limbi okpála maka: obhosi na bhelesibhelesi, omakombise, obalise ne olisi bhe na bhelesibhelesi (inde a ayo me u ha líli pi otsalisi). Lí soso-o, Polo ngaha líli pi Tito pindji lele nadholo gba makilisito, ne nadu ne mukunda, ne nadu ne guo 'ngú ngubula nakpe yala, ne nakpe tolo, a la di na gbogbo bhusu bhú Piga gba Ebhe. Ongbengbe ongú inde bhú bhuku inde-e ngae inde:

Eli na kalanu 1:1-4

Obhelesi okpála na Piga gba Ebhe 1:5-16

Engú a ayo me limbi okpála mene e bhú Piga gba Ebhe 2:1-15

Naha líli gba Ebhe ne napa me kpála du ne nalila lí e 3:1-11

Eli na soso 3:12-15

*Polo yi Tito mayi*

<sup>1</sup> Ma aye baluá inde-e ngama Polo, bali gba Ebhe, la di bhulu titima gba YesuKilisito . Ebhe aha kulu napana kpadji na nabhuka pi okpála inde ani abhu o-o mu ma ngubula me u bhuka ni, amba u ke di mboli kukulu nasuno inde ati ne mukobho inde ngadhogho ani-o.

<sup>2</sup> Abhomu-o, u ti da nadu ne 'to o me o osia mukobho na duduma masia. Ebhe inde i papa eu de-e, apana nani mukobho ango-o pi omaha e bhutode kala me ani bho kokpi ne doto. <sup>3</sup> Nedhinga inde li Ebhe a'o e akolo lie, Ebhe, Mukobho gba ni-e amene me omaha ni mbila 'li ni li kpadji nakpokpo Bádha Ngali . A bhomu-o kulu inde ani aha lili me ma mene e-o.

<sup>4</sup> Ma ngaye baluá inde-e pi mu Tito. Mu maka kukulu ndili gba ma bhú 'bu nabhuka inde ngakpotsò ní ko. A ayo me bádha bhú 'bu ne guo 'ngú gba 'Dyi ní Ebhe, di ne Yesu Kilisito Mukobho gba ni-e du ne mu bhú dabili bini.

*Lele mukobho gba obhelesi okpála na Piga gba Ebhe*

<sup>5</sup> Ma a'o ka mu bhú kpomò na Kelete, amba mu ndjia naleke ndu 'ngú hana inde atigala-o. A ayo me mu bhú obhelesi okpála na Piga gba Ebhe-e bhú ndu gudhu hana bini ne bini nakpata olili nako ma aha e pi mu-o moko me, <sup>6</sup> a ayo de me u u bhele kpála na Piga gba Ebhe-e ne siti 'ngú-o de. Ani du ne koli elò bini. A ayo me ongisi gba ani-e du omabhuka . U améne engú bini de inde u 'í uo ka e me, a ko ongisi na sisiti, di ne me, a ko ongisi na ndjondjo.

<sup>7</sup> Bhele kpála na Piga gba Ebhe-e ngalila kulu gba Ebhe-e ngae. Kaka-a, a ayo de me u u ani ne siti 'ngú-o de. A adú kpála na 'ngbé 'ndji de. Ani adú nake 'ngú lie má gala de. Ani ahá lie pi pandi de. A adú bhulu nagu gbele

de. Aní adú nagíli tía lí siti kpadjì de. <sup>8</sup> Engú bini, aní dú nasia ogomago ndjìndjì. Aní kúnda bádha 'ngú. Aní dú nabhundja 'ngú ndjìndjì. Aní dú ngbingbili. Aní dú bubu kala okpála di ne kala Ebhe. Aní dú kpála naholo bua e ka 'ngú maholo. <sup>9</sup> A ayo me aní gbite líe kpekpeke lí Eli na kúkulu inde atí ne engú inde ní asuno e pí aní-o. Abhomu-o, aní tí da nato masi bhú okpála koko ne nasuno na ngbingbili-o. Aní tsia tí la di da nasuno pí okpála inde nga'o bhayiki lí nasuno gba aní-e me uo lí pulu kpadjì.

*Polo agbele 'dje Tito pìndjì nasuno na eu*

<sup>10</sup> Okpála bhelé ne kpéke 'ndjì, a ane la mane bhú ká okpála inde ngasuno me a ayo me omakilisito kpata lílí gba omaYuda lí kpadjì nalí gandja-o . U ngapite okpála koko, u di ngapa ongú na padhá padhá. <sup>11</sup> A ayo nagbite 'bhø uo, anga u ngangbingi 'ndjì opiga libhomu ne nasuno ongú inde a ayo nasuno e de, ngubula nasia tía lí siti kpadjì.

<sup>12</sup> Suka kpála bini na kpømø na Kelete-e, adu nani bhulu imbilangu. Aní apa nani ne 'bhø e me: «Okpála na Kelete-e, a ko odidili obhulu eu, uo maka onu na 'gú. A ko obhulu ipio, u ngabhundja bha bini bula 'ngú na 'zu.» <sup>13</sup> Engú inde aní apa e bhomu-o, a ko kúkulu 'ngú. Kaka-a, mbe bhú 'ndjì uo tété kpekpeke, ngubula me u lu kpekpeke bhú nabhuka, <sup>14</sup> u a'ó la di 'ndjì o lí ongú na padhá padhá inde lí omaYuda ngagbe e bhú 'ndjì o de. U adú di namene lílí gba okpála bhende ngayala kúkulu 'ngú-o de. <sup>15</sup> Pí okpála bhende kala Ebhe bubu-o, ndu 'he hana bhadi bubu. La-a, pí okpála bhende kala Ebhe bubu ade-e, inde ayala nabhuka-a, ehe bini pí uo bubu belegu ade bini. Padhá de, anga imbilangu di ne bua nakpokpo kú 'ngú gba uo-o asiti. <sup>16</sup> U ngapa me, o mbila Ebhe hana,

engú bini ongú inde u ngamene e ngasuno me u mbila aní de. Engú inde u ngamene e nga lí okpála de, a nga la di lí Ebhe de. A ko okpála na kpekpeke 'ndji. Uo la di ne angu namene bádha 'ngú belegu ade bini.

## 2

### *Polo aha líli pí omabhuka*

<sup>1</sup> Engú bini, ngamu Tito-o, pa engú inde atí ne nasuno na ngbingbili-o. <sup>2</sup> Pa pí obhosi bhende na gbegbegbe-e me, u du naholo bua o ka 'ngú maholo. U du ne okpála inde u ngamanga o mamanga. U du nabhundja 'ngú ndjindji. U lu la di ne angu bhú nabhuka, ne mukunda, di ne 'ndjá bua. <sup>3</sup> Ha di líli pí olisi bhe na obhelesi bhelesi-o. Pa pí uo me mukobho gba uo-o du bubu kala Ebhe. U adú napa osisiti 'ngú lí okpála koko de. La di-e, u adú obalise na pandi de. A ayo me u suno pí okpála koko ongú na ndjindji. <sup>4</sup> U mene mo-o, i tsia suno pí otsalisi me, u du ne mukunda pí obhosi gba o, di ne pí ongisi gba o, <sup>5</sup> u du nabhundja 'ngú ndjindji, u adú akunda obhosi ngangá de, u 'o 'to o 'to piga gba o, u du ndjindji. U mene la di olíli gba obhosi gba o makpe, ngubula me kpála bini asóbho eli gba Ebhe-e de.

<sup>6</sup> Ha di líli pí omakombise me, u du namene ndu 'ngú hana lí lelele. <sup>7</sup> Ngamu makpe-e, a ayo me mu suno bhú okulu gba mu-o ongú na ndjindji, inde lí okpála tí da nakpata nganda e. A ayo me nasuno gba mu-o du ngbingbili, amba adu di bhe lí okpála tí da namanga e. <sup>8</sup> A ayo me 'li mu du ngbingbili, eli inde lí okpála tí da naboyo e de, amba obhulu yala gba ní-e asía engú na sisiti napapa lí ní de. Abhomu-o, u tsia djé numu na paká paká.

<sup>9</sup> A ayo me, obalise mene lílì gba omakulasi o bhú ndu 'ngú hana. A ayo me u du amene engú inde anga lí omakulasi o. U adú adjidji 'ngú sa 'li uo de. <sup>10</sup> U azí 'he gba omakulasi o de. Engú bini, u du ndu 'kpí hana ngbingbili lí pápá gba uo-o. U mene mo-o, lí okpála tsia ú me nasuno inde pindji Ebhe, Mukobho gba ní-e ndjindji ka nau lele maka u ngakobho lie-o.

*Yesu akunda me ní du piga gba ní*

<sup>11</sup> A moko, Ebhe asuno bádha bhú 'bu gba e inde ngakobho ndu okpála hana bhú siti 'ngú-o asuno. I dú kaka de-e, kpála bini de kóbho de. <sup>12</sup> Bádha bhú 'bu ango-o ngasuno pí ní nayala siti 'ngú. A la di ngasuno pí ní nayala ogumu ongu na doto, amba nedhinga ní nde nga lie pí doto inde-e, a ayo me ní du nabhundja 'ngú ndjindji, ní du namene engú inde ngbingbili, di ne bhende ngangá lí Ebhe manga. <sup>13</sup> Ní du namene moko ngubula nadjেকে ekpí na djali inde ní nga'o 'to ní 'to e-o. Lí 'kpí ango-o, Yesu Kilisito inde Ebhe gba ní na ngbéngbé, di ne Mukobho gba ní-e, agie lie píla doto bhú sangu gba e ko. <sup>14</sup> Aní aha mukobho gba e makpe pí ní ngubula nagbegbe ní bhú ndu osisiti 'ngú hana. Aní abhu ní me ní kolo piga gba ní makpe, piga inde bubu kala ní-o, amba ní du piga inde abedhe ne gumu namene babadha 'ngú.

<sup>15</sup> A bhomu-o engú inde ayo me mu suno e ne angu mu hana, nedhinga inde mu ngato masi lie bhú okpála inde ngadje mu, di ne nedhinga inde mu ngambe lie bhú 'ndji obhende i dje mu de ko. Mo oká kpadji pí kpála bini de me aní u mu padhá-a de.

## 3

*Lele nadu* ka omabhuka bhú ká omupagano

<sup>1</sup> Bhundja pi ndu omabhuka hana me, a ayo me u manga ongámási, di ne okpála bhende ngau pí 'ndji uo-o. A ayo me u mene líli gba uo-o, amba u du bedhe ngú namene ndu ongu na babadha hana. <sup>2</sup> A ayo de me u di kpála-a de. U adu obhulu gbele de. A ayo me u du okpála na guo 'ngú . A ayo me u du ndu 'kpí hana ne bhuku bua pi ndu okpála hana. <sup>3</sup> Padhá de, anga nganí di-e, ní adu nani ongingi. Ní adu nani okpála na kpekpeke 'ndji. Ní adu nani li pulu kpadji. Ondu ngangá gumu 'he, di ne oehe nanga li ní manga a'o nani ní obalise. Mukobho gba ní-e adu nani sisiti. Ní abedhe di nani ne ogumu 'he bedhe. Ní adu ayala okpála koko, u atsia adu di ayala ní.

<sup>4</sup> Engú bini, nedhinga li Ebhe, Mukobho gba ní-e asuno bádha 'ngú di ne mukunda gba e lie pi okpála-a, <sup>5</sup> ani atsia akobho ní. Ani kobho ní ka ongu na ngbingbili inde ní amene e-e de. Engú bini, ani akobho ní ka ani adje ndjinga ní lie ko. Ani akobho ní li kpadji naha Bu Bhobua pi ní. Bu Bhobua ang-o a'e osisiti 'ngú gba ní-o, ani atsia aha mukobho na mbia pi ní, ne lele nadu na mbia. <sup>6</sup> Ebhe atuko Bu Bhobua ang-o pí ní bhelé li kpadji na okulu inde li Yesu Kilisito , Mukobho gba ní-e amene e ko. <sup>7</sup> Abhomu-o, Ebhe atsia amene me ní kolo ngbingbili ka bádha bhú 'bu gba ni ko, amba ní ti la di da nasia mukobho na duduma, inde ní nde ne 'to ní 'to e-o. <sup>8</sup> Eli bhomu-o, a ko eli na kukulu. Ma akunda la di me, mu lu pépé kpekpeke, amba okpála hana inde abhuka Ebhe-e, ha lio ngú namene ongu na babadha. A bhomu-o engú inde ndjindji, inde di ne tata pi ndu okpála hana ko.

<sup>9</sup> Engú bini, mo odú namene obhayiki na ngingi de. Mo odú namene kpekebho li nakpokpo ndjándjá kpokpodumu de. Mo odú namene otolo di ne bhayiki pindji líli gba Moidje-e de. Padhá de, anga ndu ongú bhomu-o hana padhá, tata la di tété ade. <sup>10</sup> Mbe bhú 'ndji bhulu nagbogbo bhusu omabhuka bhutsibhutsi na bini, mu mbe bhú 'ndji ani bhutsibhutsi na bhisi, amba pipita ani dje mu de-e, mu de gbe ani bhú ká uo magbe. <sup>11</sup> Mu mbila ndjindji me, ngua kpála bhomu-o ayie li ngbili kpadji ayie. Ani atsia a'lo lie bhú mangimbo ngae makpe, ka ani azi 'ndji e lie bhú namene siti 'ngú-o.

*Polo aha olíli* na soso pi Tito

<sup>12</sup> Ma ngatima Alatemasi pi mu. I du ani de-e, li ma atíma Tisike. Nedhinga ani akólo lie, mu de mene ne kpéke ngú nago nabhaka ma bhú gudhu na Nikopolisi. Padhá de, anga ma apa me nedhinga na zini-e ané ma me, ma nde oo ko. <sup>13</sup> Tsia 'kpí li 'ngú na dhuku gba avuka Djenasi, ngauo ne Apolosi-e ndjindji, amba u adú bhú ndibhili 'he bini de. <sup>14</sup> A ayo di me okpála gba ní-e mbila lío ne namene ongú na babadha ngubula me u du ne oehe ngubula nateteke okpála inde ne gugumu-o ne di. U mene mo-o, kulu gba uo-o tsia zú nguwa.

<sup>15</sup> Ndu okpála hana inde bhú dabili bini ne ma-a apa me, o yi mu mayi. Pa pi ondaise ní na mukunda, inde ní nde ne o bhú 'bu nabhuka me, ya yi uo mayi. A ayo me, Ebhe tuko bisagu pi ndu yi hana!

## Gandja na Mbia

### Mayogo: Gandja na Mbia (New Testament)

copyright © 2020 Wycliffe Bible Translators, Inc.

Language: (Mayogo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 25 Mar 2022

6b4904fb-f8ce-5931-8218-7cee8914232c